



傅與礪詩集序

翰林高平范公

孔子曰詩可以興可以觀可以羣可以怨朱氏釋曰興者感發志意觀者考見得失羣者和而不流怨者怨而不怒四者之事不同而其序宜有先後蓋見他日論詩禮樂則首曰興於詩詩者志之所之以其志感人之志者訖不足以有所感發哉然則興者豈非吾先乎感入之道莫尚乎聲音入焉

傅與礪詩集序
翰林高平范公

傅與礪詩集序
翰林高平范公

寂然泯然忽而歆起震奮動蕩淪浹人之深而化
之敏者斯其效曷從而至哉古人云聲音之道與
政通夫聲者合天地之大氣軋乎物而生焉人聲
之爲言又其妙者則其因於一時盛衰之運發乎
性情之正而形見乎辭者可詹已故曰治世之音
安以樂其政和亂世之音怨以怒其政乖亡國之
音哀以思其民困正得失動天地感鬼神莫近於
詩夫詩道豈不博大哉要其歸主於詠歌感動而

已斯義也司馬太史嘗聞之矣其言曰三百篇孔
子皆絃歌之以合韶武雅頌之音夫旣合之則當
時存什一而去千百必其不合者也深矣哉聲音
之於政也聖人蓋取之矣新喻傅汝礪妙年工詩
自古今體五七言皆屢屢焉力追古人有唯恐不
及意間示余以所著編曰牛鐸音者讀之連日不
厭聞其音而樂焉以爲誠識所尚者因揭孔子之
言詩徵以師說遂續釋以告之天曆二年四月一

日范曄書于百文山房

集賢揭文安公

自至元建極大德成化天下文士乘輿運迪往哲稍稍知復古至於詩去故常絕模擬高風遠韻純而不雜朔南所共推而無異論者蓋得江西范德機焉德機沒後又得其鄉傳與礪焉德機盛矣余每讀與礪詩風格不殊神情俱詣如復見德機也然德機七言歌行勝與礪五言古律勝餘亦在伯

仲之間而德機得盛名時年已過與礪使與礪及德機之年不知又當何如也天下文章莫難於詩劉會孟嘗序余族兄以直詩其言曰詩欲離欲近夫欲離欲近如水中月如鏡中花謂之真不可謂之非真亦不可謂之真卽不可索謂之非真無復真者惟德機與礪知之及此言之及此得之及此故余傾倒於二君焉而德機已矣余無能爲矣庶幾猶有若與礪者他日足爲學詩者之依歸也傳

傳詩序
君初字汝礪余以天下同其姓字者衆也而易之
曰與礪且以與與汝聲相近而便於改稱也元統
三年七月辛巳朔揭後斯序

奎章虞文靖公

詩之爲學盛於漢魏者三曹七子至於諸謝備矣
唐人諸體之作與代終始而李杜爲正宗子美論
太白比之陰常侍庾開府鮑參軍極其風流之所
至贊詠之意遠矣淺淺者未足以知子美之所以

爲言也崔顥人品非雅馴太白見其黃鶴之篇自
以爲不可及至金陵而後彷彿焉其高懷慕尚如
此誰謂其恃才傲物者乎求諸子美之所自謂盛
稱文選而遠師蘇李詠歌之不足者王右丞孟浩
然而所與者岑參高適實相羽翼後之學杜者多
矣有能旁求其所以自致自得者乎是以前宋之
盛亦有所不逮矣國初中州襲趙禮部元裕之之
遺風宗尚眉山之體至涿郡盧公稍變其法始以

傳記
詩名東南宋季衰陋之氣亦已銷盡大德中文章
輩出赫然鳴其治平集所與游者亦衆而貧寒相
望發明斯事者則浦城楊仲弘江右范德機其人
也揚之合作吳興趙公最先知之而德機之高古
神妙諸君子未有不許之者也其後馬伯庸中丞
用意深刻思致高遠亦自成一家觀者無間言而
進士隆天錫者最長於情流麗清婉作者皆愛之
而與前之諸公先後淪逝識者然後知其不可復

得也德機之里人傳君與礪始以布衣至京師數
日之間詞章傳誦名勝之士無不倒屣而迎之以
爲上客臺省館閣以文名者稱之無異辭豈非其
風韻足以及於予所道諸君也哉予去國十年與
礪自交趾使還以家貧親老授南海文學以歸嗟
夫上林千樹豈無一枝以棲朝陽之羽哉而一官
嶺海之不厭何也前數年諸公相知者多散出於
外今明良一庭無所忌諱清澗之蒲海灣之水不

足以久煩吟詠也必矣書其別後橐如此遲其北
還則沉鬱頓挫從容溫厚有可起予者何幸於餘
生親見之哉作傳君與礪使還新橐序至正辛巳
六月朔虞集伯生序

傅與礪詩集序

傅與礪詩集卷之一

元任丘宋應祥伯禎點校

明清江錢塘熊達方九敘重校

雜著

清安堂賦爲思南李經歷作

夫何茲堂之靜佳谿谷繚以間深泉歷除而細響
木交戶而繁陰世混濁其汶汶咸役體而勞心爰
順時以息養况顯敞而開襟羗怡寂以禦煩諒君

子之所慮感人生之長勤寒暑迭而相驅靡徇逸
而非害孰忘患而恒舒雖燕樂其何傷將不見之
是圖庶依仁以自止潔吾穢而休居

敬業齋銘

惟茲生人均受厥命莫貴惟德莫尊惟性惟性如
何萬善斯全君子于學思罔或愆惟德如何有積
乃大君子于學思罔或懈詩書六藝進退灑掃近
思弗遺上達有道夙興夜寐惟一乃心毋終食弗

念毋閤室弗臨毋若彼教奕鴻鵠是惑譬茲服田
力乃有得聖或罔念亦之于狂孰曰予玩而聖之
望敬之敬之遠實邇是基有節高山君子之儀

楚辭

楚漁父渡伍胥辭劍圖歌

江有阻兮路有岐時將迫兮來何遲子弗渡兮我
心悲既渡子兮我何以劍為吁嗟行兮子無我疑

黃鵠歌為劉母王氏作

黃鵠孤飛兮傷其匹。儔生則同巢兮寡處何求死。
寧敢愛兮孰將其雛。山則有木兮隰有泉流。翔飛
何知兮雛飽以娛。雖既羽翼兮將母來休。母詒母
應兮無使心憂。

寄題袁氏具慶堂

高堂兮巍巍華采衣兮芳菲。瞻父母兮壽豈兄弟
翕兮一作未懷出則仕兮自公入則養兮于堂之
中。昊天兮福爾錫眉壽兮未已。夫人兮自有美子

曰予歸兮將父與母。

松澗引并敘

松澗引者爲林氏子晉作也。晉父信卿本
中山人客游衡陽樂其土遂居焉。信卿死
晉復築室其居之。偏題曰松澗志其師之
言也。晉讀書善鼓琴。元統初過家上冢因
北至京師無何思其所居卽慨然別故舊
而去爲作琴操三疊以贈之。

澗之水兮泠泠上有松兮鬱青青嗟衡之居兮吾
所寧胡淹留兮于帝京

澗之水兮揚清波上有松兮被女蘿我嘯兮我歌
胡不歸兮歲蹉跎

澗之水兮石楚楚上有松兮以風以雨築吾居兮
其下誰將歸兮來吾與處

歸來三曲送李建中

月皎皎兮河漢長黃鵠在天兮招我以翱翔天氣

涼兮夜未央援鳴琴兮託宮商商聲作兮風撼撼
歸來兮天路杳渺不可以終極

月皎皎兮夜既寒白露下兮衣裳單南風一去兮
何時還援鳴琴兮曲再彈曲再彈兮天地爲秋歸
來兮清都之上不可以久留

月皎皎兮寒風作猿啾啾兮怨鳴鶴常恐秋遂爲
冬兮羣物以蕭索援鳴琴兮忽不樂忽不樂兮思
吾土歸來兮山中之人不可以無父

芳草辭為杜若洲作

乘吾舟兮沅湘攬芳草兮朝行續衆美兮在予懷
靈氛氛一作芬兮不能忘進予舟兮極浦將誰思兮
遠者采杜此下或有若字兮葺蘅雜之兮宿莽羗姣服兮
夷猶撫予帶兮宜脩撥何克兮佩幃荃何化兮為
茅沅何為兮湯湯湘何為兮浩浩滿庭兮艾蕭衆
紛進兮謂予不好望洞庭兮楚之野路漫漫兮夕
愁予思君子兮孰後來結芳菲兮吾誰與

芝草歌

玄化順兮日月昌至和蒸兮地發祥燁靈草兮貴
齋房雲纒纒兮流玉英五色爛兮昭文章何所徵
兮德芬芳爰作歌兮著勿忘我君子兮思永臧

三言

滋之水奉題蘇氏滋溪書堂

滋之水濬且長流安極沛洋洋

滋之涖德所履續芬芳萃厥美

傳詩卷一
五
滋之水澹而文豐迺積淑後昆
騰聲詩播金石逾千祀永昭德

右四章章四句

五雜俎

五雜俎機上絲往復還城中兒不獲已生別離
五雜俎園中花往復還將雛鴉不獲已貧去家

右二章章六句

四言

正月二十日壽揭學士

吉月美君子有德以壽也

吉月之正日既陽止君子之生辰亦昌止天錫之
德孔茂且植允善弗易惟君子之福

其善伊何如芬如芳如芬如芳于前人勿忘其福
伊何如山如岡眉壽以康時君子之慶

慶維雲矣亦施于天華之蘊矣亦被于人君子有
言有斐其文允也令人德音振振

傳詩卷
德音振振民之正矣百祿既臻神之聽矣飲我春
酒壽考是承彼履之安于木之馮日有君子時邦
家之興

吉月四章三章章八句一章章十句

東臯詩題長沙易君美存耕卷

瞻彼東臯每每其田訖其甸之維古之人
其田每每其稼絲絲日月以治厥有豐年
維田弗治維莠生之維心弗制維欲傾之

我思古人有播斯獲子孫其承庶茂厥德

東臯四章章四句

傳與礪詩集卷之一

傳與礪詩集卷之二

元任丘宋應祥伯禎點校

明清江熊達重校

五言古詩

雜詩五首

天天園中桃鬱鬱松上枝春陽發新榮貞脆誰能
知一朝繁霜墜百卉各已萎蒼青乃自保不為時
所移向非厄歲寒何以別奇姿

傳記卷二
植蘭彌九畹種菊被三徑幽芳固殊姿馨德良可
並。寒蘭以爲美餐菊以資命。睦言理蕪穢恒使枝
葉淨蕪穢苦易侵枝葉苦不盛豈無桃與李貴此
諧野性

窮巷有畸人夙夜勤古道敝衣適至骭疏食恒不
飽歌聲若金石顏色終歲好豈無當世念所趨惡
佻巧美玉不足珍懷義以爲寶

閒夜坐中庭素月流我懷鳴琴發玄思俗音難與
諧微颺經前楹餘響正裴回欲歌南風曲聽者良
已希願言薦清廟復感鳳來儀

異人言種石可以致雙壁千金愛玄秘辛苦乃有
獲温其比君子韞積良愛惜青蠅易爲汙恒恐傷
厥德連城不願售思以置君側終歲無與言持之
將安適

從軍行

征夫遠從軍徒旅無時還炎暉薄五嶺修蛇橫道

傳言卷二
間朝食未遑飽夕寢馬能安駕舟涉廣川驅馬登
崇山生別已不惜矧畏道路艱豈不懷室家王事
有急難生當同富貴沒當同憂患

少年行

長衢

一作行

若平川輕車馳流波上有都人子明肌

艷朝霞芳塵揚遠風白日耀舞羅少年輕薄兒調
笑相經過狎坐酌美酒日莫酣且歌千金罄一笑
豪右馬能加時俗誇朱顏美女悅春華春華豈不

好遲莫當如何

經采石

未明發蕪湖終飯次采石大江天同瀉巨浪山與
敵松寒蒼蚪姿厓古老鐵色其傍有仙塚云是李
太白生爲長庚精沒與大塊息因思開元中出入
蒙帝澤御羹白瑤盃宮硯青玉滴恩榮日深重意
氣何赫奕酣歌太華小豪飲渤海窄頗聞宮中怒
遂有天上謫殷亂微子行楚昏屈平斥嗟哉唐家

帝同姓逝安適何年為茲遊千載但故迹騎鯨信
縹緲捉月詎昏惑得非厭塵羈無乃達寄客翻然
委之去富貴何足惜杜陵平生友夢寐頻見憶白
骨焉所求青山亦岑寂相去嗟已遠令人心悲塞
舉酒欲酌之帆去招不得

晚懋

朝濟黃河流莫馳長路塵路長無時已河險難具
陳高歌激層霄緬懷古之人剡木以為舟斲木以
為輪自非制作聖何以通萬民飄飄遠遊子勿用
歎苦辛

雜詩四首

皎皎素明月娟娟含今姿浮雲遽起滅圓景遂參
差山川莽回互天地亦相疑焉知冥昧中明潔終
不移弦望有恒運清光寧久虧

寸隙塵所投片言害所藏行徒惡蹶馬豈復惜其
良榮辱具自致否通亦靡常修正未蒙福為邪欲

何望天道豈遠人撫心徒自傷
溫溫匣中玉什襲慎自持荆和始見賞舉國競慕
之青蠅遽言集魚目亦相嗤昔爲人所寶今爲人
所疵保終諒庶幾逝者已如斯
白璧易爲毀常懼世所捐憂心日悄悄自好反成
愆君子遠嫌疑胡爲偷自安始知丘山累乃在半
辭間盜金信不疑攫塵惑子淵故心苟不易旣往
復何言

飛雪篇

北風厲中宵明晨散飛雪連翩素彩動泱泱玄陰
結群林互騰耀衆景紛變滅旣增寒竹姿復宜青
松節因高始成勢遇坎俄就缺東西衢路間來往
昧深轍衆穢交凌踐幽光自娛悅皎皎恒易汙無
爲持清潔

寒竹篇

寒竹依澗阿石生何磊磊滋息因厚地生成藉玄

宰春陽散華景枝葉被光彩及茲芳歲闌使我憂
心痲遽悲凜節變但恐驚塵浼寒燠既異宜遲莫
復焉悔淇園陰未息嶰谷音猶在君子夙相好深
懷邈雲海竹性諒靡遷人心懼中改願言卒封植
勿使傷樵采

梅花曲

素芳何婉婉姣服耀江湄美人慕佳植託根乃在
茲朔風振嚴冬孤花難自持流塵復浩浩焉得不
爲緇芳筵坐積思急管夕傷離頃筐暨佳實所願
及良時感彼李下人正冠乃見疑禮義夙所啟人
事偶乖睽撫樹倚增歎中心誰復知

刑部三主事慕嘗有菊一蒂三花尚書僚屬
咸異之號三台瑞品屬朝之大夫士能文
辭者傳詠其事至是奎章趙授經以其卷
見及爲賦五言一首

西曹應秋商庭戶肅以清金行戒時令嘉菊正羅

生台精麗前除流耀發華英三萼專夕秀衆芳謝
春榮連枝靡阿比同氣斯合并匪茲恤明刑何以
獲休徵願言保初服永懷歌德馨

勤耕亭

日月靡閒暇四序

一作時

更運之斯人務作業矧敢

怠遑時負耒適西疇恒患耕作遲仲春時雨至羣
物具含姿牛食清澗阿鳥鳴芳樹枝興言播嘉穀
夙夜將耘耔豈不懷逸居亦念寒與饑但使秋稅
畢聊樂及我私義農雖已遠沮溺不吾欺努力順
人命素餐非所知

右詩爲鄒福作也福豐城田家子事藝文揭先
生餘力能讀書爲聲詩又喜國語習通其學然
朴慎不忘乎勤先生甚喜之嘗手書福自爲詩
七首敘其所從出京師爲文詞者福多得其題
述是何福之能使人愛若是也學者果皆繫所
出乎於是益知藝文爲有德矣

寄題奉元張氏望松亭

青松翳高墳，重壤閉玄陰。孤亭何鬱鬱，林氣肅已深。白雲翔其巔，悲鳥相與吟。佇立以瞻望，哀思不能任。時祭羅豆觴，祖考聿來歆。歲晏寒風至，零露亦在林。危柯起悽愴，令人生悲心。逝者已如古，來者復爲今。

清明日遊城西詩

并敘

予資嗜幽澹，所遇名山水。興至輒翛然，徑

造興盡卽休，無留滯之意。客京師三年，聞西山之勝，未至焉。乃元統二年二月二十五日，爲清明節，風和景舒，卉木妍麗，金華王叔善、父四明、俞紹芳、同里范誠之與予，從一小蒼頭，載酒殺，共出遊城西，遂至先皇帝所創大承天護聖寺，縱觀行望壽安香山而還。先是約信宿徧歷山麓諸寺，迺止。至是謂三子曰：是行適意，爾卽一詣而

窮其勝豈更有餘興哉相與登高丘藉草
而坐酒數行約賦古詩五言六韻五章道
所得之趣書二十字亂器中人探五字以
爲韻時誠之止酒予又性不飲叔善紹芳
脫冠縱酌旁若無人予亦吟嘯自若都人
士游者車服聲伎相闐咽金壺玉槃羅列
照爛意若甚薄余數子者而又有若甚慕
者焉旣夕罷歸所賦詩各繕寫爲一卷明
日會余于杜氏館中夫予在同游間年最
少而好任意興三子不以予年少而奪之
誠之與予俱不舉酒而能從二子之飲不
厭其醉是游不已樂哉敘以識之

矐靈動若木晨鳥鳴東窻興言集儔侶西郊出翺
翔登高望荆吳延目極三江密林何葢菱

或作嘉
掩靄

樹翳蒼蒼感此時節遷慨然思舊邦乘風卽清曠
薄使我心降

出自城西門未知道所窮並驅涉長阜山川鬱何
雄纍纍道邊墳四顧生悲風茫昧萬物始冥冥天
地終陰陽相推化焉知搏埴工誰能同朽木俱盡
委蒿蓬

梵宮何巍巍白日耀流藻前楹交網樹陰堦被靈
草宿昔構華麗河沙施七寶丹霞通飛閣清飈激
馳道車馬縱一作從音同橫至虛空漫漫浩浩飛龍逝不
返令人傷懷抱

游子愛良辰出門各有携陽春發惠氣好鳥鳴喈
喈芳花明曲階一作新楊拂大堤羣物紛相悅斯
人多所懷飄彼陌上塵化為水底泥百年亮如此
不樂復奚為

長風度廣澤清輝汎遙甸層宮及崔嵬落景駐遐
眷羣觀各侈靡金壺列豐膳幽賞聊共娛誰云極
遊衍啜啜水中鳧翩翩雲間燕微生亦何勤志足
或非或作非非所羨士非

寄題吳興馬氏清華堂

豐堂翼華構陽景麗前楹曲流相紆帶軒牖一何
清微波涵素輝嘉卉發丹榮中庭列圖史芝桂亦
羅生有酒介眉壽內無憂患并朝弄石泉水夕采
玄玉英從之不可得願欲濯塵纓

題淵明漉酒圖

淵明性嗜飲所遇適其真漉酒東籬下邈若旁無
人捐紱非所吝焉愛頭上巾田園日成趣松菊相

與親百年何爲爾酌酤及茲一作辰或作晨非陶然至和
內混沌以爲鄰

送陳助教衆仲赴江泚儒學提舉

登高送將歸車馬橫道周白日明大河遠望悵悠
悠宿昔違鄉國慷慨事行游懷寶非固售同氣乃
相求茲焉去皇邑被命赴南州詵詵胄子徒惻惻
不能留逝將敷文教邇可被遐陬我無千金贈臨
別但懷愁獨有清商曲可以慰一作綢繆

秋風吹浮雲鳴鴈復南翔山川一作水何慄慄草木

日夜黃客游歲云除直慮切一一作莫僂俛懷舊鄉君行即

吳會執別此河梁淮泗多奔流雲海浩茫茫靈風

翼飛鱸馳景曜征裳去途日已遠來會日已長援

之不可得躑躅情內傷

瑞芝曲 并敘

瑞芝曲者為麻陽簿任君作也君掾順元

帥閩時芝產於所寓之地以為瑞圖之以

傳觀四方思州劉文學來京師持以示余

求詠其事按王克論衡土氣和則芝草生

又鵠冠子曰王者德盛則芝草生醴泉出

然則祥瑞之至有以也任君是圖豈私有

之哉亦將以侈國家之瑞也吾聞古者以

君子在位賢人衆多為國休祥任君繼自

今相率其僚為豈弟之政以布天子之德

于民則為祥莫大焉芝瑞云乎哉

聖人運元化和澤被遐方黃靈啓幽秘朱草發嘉

或作佳 祥曄曄晨敷秀藹藹夕含芳慶雲流瑞露丹

霞沃太陽細縕所凝結玄造亦何常夷居勿云陋

斯人樂以康繼今崇令德諸福應時昌

題陳氏菊所

陶公逝已遠舉俗慕高情之子厭塵雜開徑挹其

清晨起除翳菑或作種菊蔽前楹結根固其

所獨立誰為榮中園何菜敷綺席蔭朱甍車馬日

自臻絲竹騰妙聲凝霜既被野繁露復盈庭百卉

豈不佳朝敷夕已零東籬信淒索可以托幽貞

題董氏具樂堂樂義取榮啓期之說

董生築高堂于以養其親溫軒納飛旭涼牖謝流

塵大椿蔽庭前慈竹映冠巾中厨足甘脆可以奉

昏晨有酒及嘉賓餘歡洽四鄰生當隆盛時至德

覆無垠羣動各蠢蠢靈明貴斯人既復為男子夙

夜懷苦辛年命恒或作幾何胡為勞其神所以榮

公者樂世乃忘貧矧茲堂上翁安富殊等倫夫婦
齊壽考遐福日以臻有子才且賢有孫復詵詵如
何不為樂言笑及良辰好鳥四時鳴佳花萎復新
黃髮日娛戲焉知冬與春

挽張隱君

峩峩浮柵山鬱鬱彭蠡濱中有隱居者消搖畢冬
春讀書佃城府杖屨率耕耘雞黍會田家酒醪合
四隣既醉亦詠歌富貴如埃塵一朝厭浮世含笑
返其真貴賤同一盡各為丘與墳所立苟不忘浮
雲焉足珍

彭叔璵得杏花一枝歸置小齋同居王叔善

甫邀余同賦杏花曲人一章約五言五韻

成

朱葩含朝景流芳自中園顏色一何麗一作媚灼爍

耀櫺或作靈非軒嘉賓從外來臨賞各欣然同根豈不

好異處乃殊妍貞心諒自知脉脉終不言

題叢蕙

蕙葉何青青羅生被巖隙中庭忽邂逅四顧風蕭
蕭含翹紛旖旎懷馨潔以脩時俗苟不佩芳草或
爲茅微物恒易遷君子內傷憂願從芝蘭化庶異
薰與蕕

題草蟲圖

大氣流天地動植紛自形陽卉耀春華陰條敷夕
榮昆蟲信微細于以托生成守宮夫何慕蠻觸諒
奚爭蚩蚩伏青蕤跂跂緣紫莖促織焉念寒牽牛
不事耕吳公性含毒多足復能行莊周齊蝶化晉
惠昧墓鳴玄蟬翳高枝君子慕其清蛭蜣溺所嗜
汙穢不能靈感茲動中懷變幻焉足馮羣生各有
命鴻化亦何情

送張景陽歸覲

鴻鵠懷遠舉騏驥慕高馳志士多慷慨文墨徒相
羈挾舟行遠游翩翩至京畿京畿四方會冠珮交

陸離紫宮承星辰高蓋爰雲霓聖人內垂拱至德
徧羣黎求言逮微賤一善思罔遺君子道既達胡
爲忽言歸嚴冬霜霰零晨起候鳴雞送者亦在門
南望各逶迤願君自貴重歲寒勿相違

題

太虛馮緼縕萬化更往還函生雖異靈蘊德諒斯
全聖人繫周易茲道廓以宣鬼神無逃情天地泄
幽玄稽微內無象舉大窮八埏研思何能極精意
乃不煩來者紛討求窈窈元氣端君子依怙運小
人昧至言憂道不可忘正利非所先需進良有時
知命復何患

使至真定赴都計事遇大電傷穀時逆臣唐
其勢誅

午發滹陽城莫投鄙村店人烟樹相錯分野昴相
占連屋臨古塗幽花垂深塹行旅各已息下馬卸
征轡形容風日稿衣服塵土染倚床秋蕭蕭汲井

傳言卷二
月灑灑舍翁得客喜亭長見官厭田家始收穫勤
苦供稅歛夜來大雨雹婦子憂食歉還聞公侯家
終歲酒肉饜天子今聖明誅鋏盡奢僭覆車監前
轍焚室戒微焰禍淫良已速福善終必驗區區予
何人行役奚足念

中山北道傍丘阜

自出城北門平野亘長雲道傍多高阜纍纍若丘
墳豐草爲不生白日何氤氳焉知非陵墓下有長
逝人棺槨化爲土衣冠腐爲塵旣往不可見來者
不可聞百歲何足恃爲生良自勤

八月十三日至京

孟秋涼飈至驅車出西門去京始彌月白露忽已
繁茲行亦何爲于役義所散山川旣悠遠晨夕違
清溫我馬北以南豈不慕丘園努力在王事賢勞
奚足論

九日夷山驛

馳驅涉長道時節良易更去日能幾何商飈以
盈玄蟬號且息羣鴈翩南征茲辰揆重九在俗豈
殊情抗袂出虛館登高望舊京圓穹無留翳素顥
有餘清延矚周四遐但見古時城頽宮委蔓草喬
岳襲前名茫茫陰陽間感此百慮并我性不解飲
虛觴聊自傾

使還至長沙侍嚴親及外舅孫公遊

仲春景氣妍卉木具萋萋中園凝芳暉時鳥鳴且
啣遊子遠干役歲晏乃旋歸父母日瞻望親戚久
睽違及茲時物佳少長翕相宜携壺出東部聊以
舒求懷鴻鵠隨天風焉能忘舊栖王事亦可念勗
哉以驅馳願言飲春酒各保黃髮期

歌風臺

黔首厭秦暴龍德奮炎劉英雄乘天誅拔劍起相
仇天風隳陵谷飛雲揚九州天下事既定懷土未
遑休置酒晏高臺中厨進庶羞悲歌落林木父老

傳言卷三
皆涕流。功臣日。薤醢壯士。復何求。至今豐沛間。長
顧使人愁。故鄉帝所愛。零落遺舊丘。大運各有終。
聖賢誰能留。焉知萬歲後。魂魄復來遊。

雲松巢爲劉益之題

青松矗雲際。此有巢居者。心清謝秦爵。根遠思夏
社。斤斧庶不戕。棟梁誰能捨。常懷太古世。木處人
事寡。高步凌靄黷。幽棲據瀟灑。星河入戶動。霧露
當虛瀉。重霄紛相屬。九域莽在下。磅礴俯大氣。微
茫見平野。飛仙遙相卽。風翮時可把。浩浩區中塵。
流景若馳馬。鳳鸞或叢枳。燕雀乃大厦。所以安一
枝。萬事齊土苴。

送范悅古再之江西憲史

客行辭國都。南望越山河。燕趙宛相距。吳楚爲我
家。別離生永歎。送子以長歌。長歌慷以慨。憂憤一
何多。大道日隳墜。逝川無還波。浮雲翳中天。明月
乃爲瑕。君子燭微詞。小人祇自阿。素心苟不渝。非

傳言卷三
意馬足加嚴霜厲松栢日出當柰何歲晏將自見
願勿改其柯

疾風暴陵谷所觸爲我仇林木無寧枝大江汨其
流悄悄君子心熒熒增隱憂歲月忽馳邁行道阻
且脩白日臨九圍環照靡窮陬卞生獻竒璞再削
始見收不有固窮節焉能忘怨尤行矣勿重陳居
易復何求

送別宋子與

人生若浮雲冉冉各四馳居同桑與梓會合乃在
茲華月洞靈襟高霞敷麗詞晤言永相好暫失繫
懷思矧當萬里行策馬從此辭舊鄉未同返胡能
忘嗟咨仲春景氣妍翔鳥悅深枝弭節湘川滋迂
轡俯江湄及家洵云樂懷土非所期榮名務不朽
慎勿棄良時

用謝玄暉入朝曲分韻送馬中丞赴南臺得
收字就用其體

金陵鬱迢遞行旆暖悠悠蘭臺清露集松庭積靄
收白鷺迴脩渚朱鳳矯崇丘離離曳青綬曄曄振
彤騶遠甸芳風散神都旭景浮臨軒結冲想還車
寧久留

朝出國南門

朝出國南門北顧望重城紫宮承星辰雙闕岌雲
興貴賤各有安孰知昔所營天地忽震蕩山川皆
沸騰虹霓貫白日鳥獸相號鳴達士多憂傷貪夫
偷自生佇立何長嘆天道安可明

西行出周道

西行出周道歷覽至平原澤澗何寂寥豐鎬若浮
煙二公營洛邑王業亦已艱禾黍忽離離麥秀復
芊芊不見舊宮室但感書所言嬴秦滅諸侯雄跨
六合間商君用法令一朝廢井田赫赫彼宗周在
昔多聖賢消歇無復餘何況恃強堅

和周伯溫翰林齋宿

英顛散微颺圓靈夕清穆詞林屈嚴祀齋房敞空
曲臨下赫明明在公誠屬屬風條象九奏露樹彰
三沐書告蠲柔翰陳詩列明燭從昏禮既虔迨旦
興猶夙皇德亮攸歆景命忱有僕升氣管蕭問奠
幣玄纁束神休對精享至和敷百祿將事庶無懈
來祀求相贖

秋日懷搢翰林二首

涼風吹庭樹天地何蕭索玄蟬寂不鳴羣鳥飛相

失寒氣日以至誰能無家室驅車望江介道路馬
可述河濟無安流原野皆蕩潏稷黍寧復遺草木
但蒙密虎豹無時號蛇龍多夜出對此不能言懷
人易成疾

遠行去鄉邑單栖無匹儔黃鵠鳴中天夙昔乖所
求東西無恒舍南北異遨遊同居更離處誰能心
不媯日月逝無厭弦望疾若流咫尺踰千里翹思
若三秋白露淒以降寒風忽我道蘭芳委岩谷蔓

草靡道周君子多思念感物諒懷愁河海豈無梁
風波安可由且復加餐飯無爲增隱憂

送仇繼善歸光州

季秋寒風發時物日淒淒鴻鴈鳴索羣野鳥求其
棲寒暑不貸人客遊多所懷昔爲山上雲今若水
中泥曲躬狗微祿時俗誰能諧大道良阻脩中路
顧低回朝發城南門日莫淮水西歸我從吾志貴
賤焉可齊

送蕭介石

游子慕名都負志辭草萊驅車望國門宮闕何神
哉月入軒車動雞鳴閭闔開王侯多晏集弦管切
雲哀燕俗信英雄自古皆愛才黃金致賢士賓客
四方來俛仰時旣遷蔓草沒荒臺不見古時人何
以舒永懷舍茲復南去怊悵不能裁

冉冉歲將莫寒氣下嚴霜征夫懷往路執手野徬
徨草木旣蕭條山川悠且長念子今何嚮言適鄒

魯鄉泰山鬱崔嵬沂泗浩洋洋自昔生聖人衣冠
宿所藏詩書被遺俗禮樂未云亡豈不念時好斯
道不可忘願求同心者携手與翱翔

胡氏存菊堂

素商薄庭戶豐草日已萎晨興顧林薄百卉無復
遺叢菊依前除遲其獨相宜清飈振綠葉零露發
幽姿淹留諒有俟暴盛非所期對此時物佳欣然
賦新詩嘉賓旣在門有酒復盈卮日莫采其英斟
酌及茲時四序委元化焉知榮與衰

九日會飲和胡古愚并簡諸公

凜秋肅已至榮木遺故枝蕭蕭鞠在庭汎汎酒盈
卮興言愛重九良會欣及期飲酒非所性杯至聊
共持天地嗇余閒羲和逝若馳陰陽紛離合變化
雜神奇太古不可還溘風日已漓佳辰樂清讌言
詠竟餘暉微月忽在楹驚飈滿裳衣斯興良未極
携手且同歸

梓人圖

聖人肇宮室制作配陰陽般輪守規矩經畫故有
常營構在斯須斤斧若飛揚深林產喬木可以勝
棟梁大材諒不遺細者各相當青雲爰華厦丹䟽
通曲房日月齊晦朔天地擬圓方茨墜既具周丹
聖亦輝煌居處信崇高先民不可忘君知太古世
巢穴以爲堂

和趙德隆秋夕雨

落景翳重城凝陰起初夕蕭條飛雨至散漫輕颺
激洒幌靜彌多喧簷暴復息清商亂急管遙怨生
離席游子恒念鄉氣淒感時易既興北風歎亦抱
南山戚晨雞不廢度征鴈無寧翼嚮道乖夙期寸
陰違所惜詠歌良可興幽懷坐填積

和韓都事秋夜

招搖指西北河漢被天東四節自成歲衰榮焉可
同陽卉日蕭條陰林不復濃慷慨夜多念太息生

傳言卷一
三十一
妻風鵬鶚一作鵠蔽中天野草集蜚鴻即蟻羣物各
有適焉知心所從

雪中送宋上舍仲敏歸滑州省親

北風何烈烈雨雪亦雩雩遊子去成均將歸一作往
古靈昌詩書豈不樂歲晏懷我鄉我鄉伊可懷父
母在中堂休告亦有時定省焉可忘浮雲踰大伾
白日照宣防子行日已至送者各盡觴當歌念遠
遊令我愧中腸

寄題番陽劉氏靜觀齋

萬化紛往還陰陽相終始人生齊性命誰能獨離
此寂寂山中士冥冥會其旨大窮六合外細攝秋
毫裏因茲達變化何嘗惑生死林春野花發庭雨
流雲起對坐終日閒悠然閱圖史

菊坡爲白公嚴賦

蕭菊生林下含英覆坡陀離離帶長坂萋萋間層
阿靈飈度鮮葦濃露濯寒柯靜者愛幽姿對之行

傳詩卷二
且歌朝作常不忘夕息以婆娑廩秋薄原野百卉
忽已過偉茲霜中秀獨立諒殊科始志苟無違芳
非豈在多

四月十四日發京

六龍西北馳羣鳥東南翔感我客游士心神隨飛
揚迢迢踰大河怳怳越崇岡已驚時序易復念道
路長驅車出東門浩歌慨以慷燕薊豈不樂吳楚
爲我鄉父母久違離兄弟不在旁當茲遂歸志聊
可慰中腸

劍門圖

劍門天下險亦復天下壯崢嶸扼西南氣欲軋萬
象石壁摩往來風湍東奔放深鑿虛無底峭出日
月上二儀含崎嶇萬古設眺望一夫或當關強敵
不敢傍胡爲昔人國恃此亦傾喪聖朝今無外皇
化極浩蕩勢狹秦漢爭治同唐虞讓乃知不在險
六合德可王前年南中行其地少平曠縣車度重

隘束馬下疊嶂翻疑蜀道坦劍閣固殊狀及此觀
畫圖間關愁西向浮雲從中來日莫一惆悵

城西墓田

題下或有和
羅若川韻

世傳神仙壽舉俗爭慕之不見松與喬高墳但纍
纍松柏蔭路衢行者慘逶遲遙遙千載心只爲後
世悲秋春更代謝萬化諒如茲自古皆有盡今名
百世遺生時不努力死後竟何爲

送何志友抱琴遠遊

客從東南來辭我將遠征九州何遼邈道路縱復
橫商飈振長林露氣淒以清感此歲月變念子將
何行聞有太古琴鼓之南風生一奏天地和再奏
萬物成知音亦已寡持此感人情願言或作薦宗
廟可以備咸英

題胡質夫更好山亭

盤盤青山阿萋萋嘉樹林中園誰所治亭榭藹沉
沉貞松蔭奇石修竹亂珍禽時雨濯丹葩春陽敷

綠陰游觀日成趣巖谷有清音他山豈不好誰能
同幽襟矧茲菁靈秀芳氣蔚以深油雲始膚寸可
以致甘霖沛然澤羣物乃復返高岑始知茲山靜
仁者諧夙心卽此得消搖浮名何足欽

題胡信夫一川風月亭

斜川多佳山流水會中園華亭鬱深秀卉木茂且
蕃明月賁林幽清風行樹間流彩散復定微雲中
往還幽人坐平石日夕觀其瀾素暉迴衣巾爽氣
在櫺軒會心時自知意得復何言

贈樸著蕭達則

太極函二儀萬象昔未形陰陽倏變化竒耦互相
乘羣生六合中動作何營營吉凶紛自致憂吝焉
所徵天道良已微人事豈無恒聖神發著策樸扞
見其情大易攄玄秘至言不可更俗流師異端恠
妄昧前經達生乃稽古茲義日脩明願言善其用
庶以道自成

挽劉雨卿

慕高隱乃在北山睡感昔生離亂弱齡已自

持在

營課子以書詩秋桂擢丹葩春蘭敷

紫蕤既壽亦且康浮名何足羈一朝乘化盡溘然
與世辭天地亦有終聖賢各如茲生存苟無憾委
順復奚疑

王芝曲為鄧或之作

聖人履昌運至德配方貞郁郁休氣翔粲粲靈草

鮮英雲被素趾甘露洒華顛上有飛鳳凰下有湧

醴泉銅池詎方秀瑤圃諒齊妍聞昔松與喬采之

以得仙願因獻天子服食致長年

漢宣帝時金芝九莖產於函德

殿銅池中芝色如金銅池承雷也

題顏友立耕樂堂

深居謝輪鞅畢力事田園生世食其勤誰能同久

安晨興負耒出日夕乃來還時雨集丘隅雲禽鳴

樹間桑麻蔚北墉稼穡藹南阡鄰曲多往來斗酒

數為歡誦書不求解契道乃忘言在昔譏素餐畎
畝多聖賢簞食苟無憂作勞非所歎

琵琶怨

美人揮哀弦上客歎蛾眉急響多悲思孰知心所
之感昔奉綢繆不言生別離誓將桃李顏結君長
相思如何雙栖翼中路忽乖睽不怨歡會難但恐
恩愛虧含情異同顧中曲多苦辭君子苟不聽賤
妾欲奚為

團扇辭

團扇昔在時素手不相離涼溫得君意動息亦有
儀炎暑良未徂思愛詎中衰何言遽相失一旦棄
如遺舊物諒非貴故心不可移願言新人得持以
置君懷

題過氏適安堂

營營俗間務莽莽城中塵疑水悲夏蟲惡影笑塗
人達者悟茲言思還樂我真生世嗟物役誰能勞

其神過是諒非慕爲歡聊及辰深居無塵雜豐屋
麗且新庭柯集翔鳥池藻散游鱗委化獲自然戚
戚非所遵庶將依仁宅處樂以終身

題蘇氏耕綠堂

少年思薄宦旣老思田里耦耕非吾事素食良所
耻時雨行東皋平疇被流水興言命童稚東作從
茲始飯牛桑苧陰秉耒郊原裏舊麥旣青青新苗
復靡靡升堂舉杯酌閒暇閱經史有秋庶可待敢
本聊自喜古人不復存斯士亦云已食力吾所安
夜行貴知止

題王元載御史爲潘彥賓作幽人瞻綠圖

曳杖緣芳沚引睇盼前林脩篁鬱葱藉亭構遂沉
沉零露發春姿流雲滋夏陰蒼輝度行袂碧影赴
橫琴美色非所貴高節良可欽歲月自流邁霜霰
日交侵青青乃不渝瑟瑟有餘音比物思衛風瞻
望意何深爰求詩人體實獲君子心永言託嘉喻

聊用寫幽襟

徐氏生意亭

芳春會陽景佳氣蔚前楹春澤亦已和時物日滋
榮茫茫大鈞軸坤北四時成就知萬象先甲者悉
未萌陰陽無停化元氣以流行觀茲悟生理人道
亦有恒百穀播始獲一作大倉積乃盈願言樹豐
德奕世永其生

飛龍圖

聖人御天下九五應乾元神物何矯矯精氣久乃
全屈信陰陽際出入有無間風雲一時合雷雨相
後先下顧周八方上行窮青天流澤無愆候原野
以豐年功成不自居寂然歸九淵

觀外傳為天寧講主慈公賦

團團虛白室了了圓通士心觀乃非目性定猶止
水羣動紛自形諸緣遍相倚譬如中堂上坐見前
林裏空方無定在內外非可擬凡此分別見皆緣

識根起微塵。含空畛玄象。標月指應現。本無方。恒
不離所止。世人執邪見。外驚何時已。應當離諸礙。
玄悟從此始。

題宜春鍾清卿清露軒

清卿能琴

秋氣集太虛。夕光溥高樹。時聞陰液墜。暗識商飈
度。旒旒星動林。英英月霏霧。涼扇息塵想。幽琴寄
玄悟。寂歷松上聲。消搖丘中趣。鈞天澹斜景。銀河
暖微素。古調今所稀。大音誰能喻。仙人飲沆瀣。壽

命金石固千歲。不可期空歌徒延慕。

挽談孝子

采字文卿。清江人。侍父尹零陵。父病。顛天乞以已年益父壽。已而采

卒而父安葬。

村鄉常山

白壁傷易毀。幽蘭悼先頽。陰陽訖吹噓。脩短從所
制。伊人邦之秀。少小拔其萃。孝友積和順。辭華著
光麗。青春何忽忽。韶景曄云逝。愛親希長年。保已
非素志。至今常山下。行客揮涕淚。芳風吹諼草。英
雲被叢桂。去者日已長。來者日已繼。立世務不朽。

生死徒歔歔顏殤易爲感跼壽何足貴

挽廖節婦

孝子妻

關雎有恒匹別鵠不更雙婉婉令母儀煌煌君子
堂事夫死同穴誰能易其常皋蘭殞夕露庭菊厲
朝霜芳齡誓靡適莫齒終弗忘懿德耀高閭清風
彌大邦衰榮一朝異縞素發道傍虛窻委斷織重
壤燁幽釭高山上峨峨流水下湯湯瞻言歌衛風
三歎我心降

題栢友亭

交道日淪喪結恩不結誠朝爲春華敷夕已秋葉
零薄俗傷易遷使我慕清貞深居謝朋游嘉樹旅
前庭影直靜相偶心通潛有聆霜霰依時至雨露
互滋榮下根附旁薄上枝拂窈冥興言著歌詠伐
木感嚶鳴德義古所散切琢庶相成友已苟無益
不如草木生
種木必種堅取友必取端汎交無完節常木有凋

傳詩卷二
三五
殘彬彬魏亭士古栢義所觀封植嗣前規斧斤違
世患衆芳或搖落脩榦鬱桓桓舊本亦已固新枝
日復蕃夏蔭交座隅秋影溢簷間薰濡致馨德採
服資妙顏不有後凋操誰茲同歲寒

題啓瀛洲圖

龍姿御昌曆詞館萃羣賢對問日優暇更番時後
先退集樂餘閒誰能徒食眠游藝亦云末寓情諒
匪專十洲不可求瀛海以言傳遂令是中士望者
稱若仙丹青孰是非翰墨互騰宣才難古所歎後
者或求全

和虞公同李伯宗賦昱公四珠精舍

泠泠清澗流磊磊碧山岑巖栖遺紛競禪憇悅幽
深雨過虛室寒寶氣發前林明月交珠柱微風來
樂音圓明攝諸境空觀明宿一作心嗟茲遠行客
悵望結襟

淵明圖

淵明高世姿稟性良寡諧出仕諒云偶忽去亦奚
疑人生驅衣食微祿恒累之枉已既非志在俗固
多違萬鍾不足顧五斗奚以爲卓茲千載中作者
與爲期

題麋架閣所藏故人新竹圖

叅差蔭竒石磔礫連孤樹初籜既從風新枝復承
露瞻茲時物化感彼芳辰度故人思久要夙昔乖
良晤山阮詎非倫求羊諒同趣虛心願自比從今
至遲莫

九鷺圖

鮮鮮白鷺羽振振清江溼露草寒已衰風蘆近相
蔽飛鳴各自適離居亦有次雖愜江海情終懷雲
霄志君子思有則畫者工取譬儀羽庶可希脩潔
誠所貴

羣鴈圖

微茫洞庭野隱約瀟湘岸鴻鴈將栖息飛鳴求其

伴先集良未安後至凄欲斷使我懷弟兄因之中
腸亂留連江海遠慘淡秋暉晏常恐隨天風高飛
入雲漢

題袁宏泊渚圖

秋氣集空渚月彩沉微波夕坐起遙思中流聞
歌移舟近相即酌酒望銀河高懷世稀偶良會豈
更多未知百歲下視此復如何

題袁安卧雪圖

積雪既填戶衝風或入衣空廬獨僵卧豈不念
饑薄俗何足干固窮良自爲自非洛令賢誰能
荆扉茲事已云往高風今絕稀

刈蘭棘圖

爲了上人題

樹蘭勿近棘剪棘或傷蘭惡木翦復生芳草樹不
蕃空門一諸幻君子殊衆觀薰蕕戒同器玉石忌
俱燔不見致芻人懷馨增末歎

題張仲衍書屋圖

茅屋閉柴荆。度橋聞讀書。風含萬谷動。雲集兩崖
虛。松葉走山犬。花源通夜漁。世俗自多違。林泉非
見疎。他時或相憶。來就北山居。

題雲崖圖

高崖含青空。雲氣所出入。綑縕日千態。斬絕恒特
立。兩合龍挂低。風迴鳥飛急。寄言為山者。進簣庶
可及。

題張伯龍書屋圖

清江帶茅宇。絕壁連松寺。溪響漁未歸。橋聲客應
至。數鴉林外落。一犬庭陰睡。終日對羣書。焉知俗
間事。

題墨竹

吾聞崑崙竹。可截黃鍾管。千尺雲外姿。數寸煙中
斷。時人拘兩目。所見何自短。撫卷方寂寥。清風坐
來滿。

題石榴畫

漢使致石榴千秋見佳實漿寒瑪瑙破枝重珊瑚
屈憶昔開大宛疑將薄西日丹青有微喻意豈貴
遠物

題山水小景雜畫

晴烟翳高樹野水連幽草渾疑輞川業復似斜川
島鷺下白波閒鶯啼綠陰好安得買田廬相從是
申老

空村斷行迹深雪連昏莫慘淡既平岡坡陀復盈
路時聞一樹折猶見羣鳥去中有映書人柴扉對
何處

江白雲稍歸山青樹如沐輕舟漁石渚獨騎經林
麓野氣昏已明泉聲斷猶續坐憶汎湘時村西見
茅屋

雲煙狀幽絕正壑懷棲遯新雨松樹涼輕颿竹林
晚閉門堆亂石曳杖行修阪寂寞垂釣翁扁舟去
人遠

雲歸山欲暝月出泉相映石影生夜寒松聲起僧
定遙疑露下立或發風中詠幽境何闐寥長廊罷
鐘磬

平湖寫山影遠嶼來花氣魚鳥終日間琴書有時
至風檣出彷彿雲木生迢遞對此獨逍遙誰能識
幽意

雲山不可極野水多相似古木生夏涼幽篁起秋
思漁舟石下出歸騎山陰至中有隱君廬蒼茫何
處是

盤盤蒼山根泉出如素練含風靜復響觸石驚相
濺竹迴秋氣來松涼夏陰轉山翁閱妙理獨立無
人見

野樹陰輕舟晴波照層巘平橋昔未斷孤客來何
晚坐使春思多應懷暮山遠□□□□□□□□□□
□□

題墨梅

老樹亞晴空疏花帶寒野風流不自惜澹泊從人
寫歲晏孰能娛空山少來者
孤花何婉婉玉立含幽素短短時出橋疏疏或臨
路坐疑檐下月半照牆西樹

傅與礪詩集卷之二



